



Broj: 01-50-1-15-33/08
Sarajevo, 29. jula 2008. godine

Z A P I S N I K

33. sjednice Predstavničkog doma
Parlamentarne skupštine Bosne i Hercegovine,
održane 29. jula 2008. godine

Sjednica je počela u 10,10 sati. Prisustvovalo je 35 poslanika. Odsustvo su opravdali: Sead Jamakosmanović, Husein Nanić, Zlatko Lagumdžija, Milorad Živković i Hadži Jovan Mitrović. Snježana Rajilić i Mirko Okolić nisu javili razlog izostanka.

Iz Vijeća ministara BiH sjednici su prisustvovali predsjedavajući Nikola Špirić, ministri Dragan Vrankić, Tarik Sadović, Bariša Čolak, Safet Halilović i Mladen Zirojević, te zamjenici ministara Marina Pendeš, Mijo Krešić i Fuad Kasumović.

Iz međunarodnih organizacija prisustvovali su predstavnici: OHR-a, OSCE-a, EUPM-a, EUFOR-a, EUSR-a, američke ambasade, kao i nevladinih organizacija NDI i Centara civilnih inicijativa.

Sjednici su prisustvovali predstavnici Visokog sudskog i tužilačkog vijeća BiH zbog razmatranja njihovog izvještaja o radu za 2007. godinu.

U uvodnim napomenama predsjedavajući Doma Niko Lozančić obrazložio je izmjene i dopune prijedloga dnevnog reda koji su poslanici dobili u pozivu za sjednicu.

Nije bilo rasprave o prijedlogu dnevnog reda.

Predsjedavajući Doma konstatirao je da 33. sjednica ima sljedeći

D N E V N I R E D

1. Usvajanje Zapisnika 32. sjednice Predstavničkog doma,
2. Poslanička pitanja i odgovori,
3. Potvrđivanje Odluke predsjedavajućeg Vijeća ministara BiH o imenovanju ministra vanjske trgovine i ekonomskih odnosa BiH;
4. Zahtjev Ustavnopravne komisije za razmatranje Prijedloga zakona o izmjenama Zakona o krivičnom postupku BiH po hitnom postupku, u skladu s članom 127. Poslovnika;
5. Zahtjev poslanika Jerka Ivankovića Lijanovića za razmatranje Prijedloga zakona o podršci domaćoj proizvodnji po hitnom postupku, u skladu s članom 127. Poslovnika;
6. Prijedlog zakona o izmjenama i dopunama Zakona o finansiranju političkih stranaka, predlagači: poslanici Šefik Džaferović, Niko Lozančić i Milorad Živković (drugo čitanje),
7. Prijedlog zakona o dopuni Zakona o službenom glasilu Bosne i Hercegovine, predlagač: poslanik Adem Huskić (drugo čitanje),
8. Prijedlog zakona o izmjenama Zakona o ministarstvima i drugim organima uprave Bosne i Hercegovine (drugo čitanje), Zakon broj 01-02-9-47-1/07, od 12.9.2007.,
9. Prijedlog zakona o izmjenama i dopunama Zakona o Državnoj agenciji za istrage i zaštitu, sa Izvještajem Zajedničke komisije za odbranu i sigurnost, Zakon broj 01-02-6-58/07, od 17.9.2007.,
10. Prijedlog zakona o kontroli kretanja oružja i vojne opreme, s Mišljenjem Zajedničke komisije za odbranu i sigurnost;
11. Prijedlog zakona o graničnoj kontroli, s Mišljenjem Zajedničke komisije za odbranu i sigurnost;
12. Prijedlog zakona o izmjenama i dopunama Zakona o carinskoj politici BiH (prvo čitanje),

13. Prijedlog zakona o izmjenama i dopunama Zakona o Vijeću ministara BiH, predlagač: poslanik Milorad Živković, s Mišljenjem Ustavnopravne komisije;
14. Prijedlog zakona o izmjenama i dopunama Zakona o ministarstvima i drugim organima uprave BiH, predlagač: poslanik Milorad Živković, s Mišljenjem Ustavnopravne komisije;
15. Prijedlog odluke o usvajanju Saobraćajne politike BiH za period od 2008. do 2020. godine,
16. Odluka o učešću jedinica Oružanih snaga BiH u operaciji podrške miru "Iračka sloboda" u Iraku radi potvrđivanja (podnosilac Odluke: Predsjedništvo BiH),
17. Izvještaj Zajedničke komisije o usaglašavanju teksta Zakona o jedinstvenom matičnom broju,
18. Informacija o izdatim dozvolama za promet oružja, vojne opreme i proizvoda dvojne namjene za 2007. godinu,
19. Izvještaj komisije Kolegija o nastojanju za postizanje saglasnosti o Prijedlogu zakona o javnim putevima (zakon u prvom čitanju),
20. Izvještaj komisije Kolegija o nastojanju za postizanje saglasnosti o prijedlogu za primanje k znanju Godišnjeg izvještaja Visokog sudskog i tužilačkog vijeća BiH za 2007. godinu,
21. Izvještaj komisije Kolegija o nastojanju za postizanje saglasnosti o prijedlozima zaključaka i amandmanu povodom razmatranja Izvještaja o radu i finansijskom poslovanju Javnog preduzeća Novinsko-izdavačke organizacije Službeni list BiH za 2007. godinu, i to:
 - a) zaključaka Kluba poslanika SNSD-a (u tri tačke),
 - b) zaključka broj 1. poslanika Momčila Novakovića,
 - c) Amandmana poslanika Remzije Kadrića na Prijedlog zaključka Komisije za finansije i budžet,
22. Izvještaj komisije Kolegija o nastojanju za postizanje saglasnosti o zaključku broj 4. iz Izvještaja Komisije za saobraćaj i komunikacije i prijedloga zaključka poslanika Jerka Ivankovića Lijanovića povodom rasprave o tački: Poslovanje Javnog RTV servisa Bosne i Hercegovine i mjere za prevladavanje stanja utvrđenog revizorskim izvještajima za 2005. i 2006. godinu,
23. Davanje saglasnosti za ratifikaciju:
 - a) Ugovora o kreditu između Bosne i Hercegovine i OPEC-ovog Fonda za međunarodni razvoj – Projekat rekonstrukcije željeznica dionica (I) Sarajevo-Bradina,
 - b) Sporazuma o kreditu između Bosne i Hercegovine i Bank Austria Creditanstalt AG – Projekat izgradnje vodosnabdijevanja u općini Srbac,
 - c) Sporazuma o finansiranju između Bosne i Hercegovine i Međunarodne asocijacije za razvoj – Projekat putne infrastrukture i sigurnosti na putevima,
 - d) Sporazuma o kreditu između Bosne i Hercegovine i Raiffeisen Zentralbank - Austrijsko dioničarsko društvo – Modernizacija Univerziteta u Zenici.

Ad. 1. Usvajanje Zapisnika 32. sjednice Predstavničkog doma

O Zapisniku nije bilo rasprave.

Sa 30 glasova "za" (Federacija BiH 20, RS 10) i četiri "suzdržana", usvojen je Zapisnik 32. sjednice.

Ad. 2. Poslanička pitanja i odgovori

U uvodnim napomenama predsjedavajući je obavijestio Dom da su do ove sjednice odgovore na pitanja dobili: Milorad Živković, Rifat Dolić, Šemsudin Mehmedović i Denis Bećirović.

Nije bilo komentara na odgovore.

Nova pitanja postavili su poslanici:

Sadik Bahtić:

1., „Ja ću u kontinuitetu i kazao sam da ću na svakom Parlamentu postavljati poslaničko pitanje o imovini bivšeg Saveza komunista koju SDP nezakonito koristi. I još jednom upozoravam

Vijeće ministara da radi po odluci ovog parlamenta da se ta imovina popiše i vrati stvarnom vlasniku.“

2. „Tražim da mi Pravobranilaštvo BiH odgovori na pitanje: Šta će i kada će poduzeti da se direktna i indirektna šteta, koja je nastala korištenjem bivše imovine Saveza komunista od strane SDP-a, nadoknadi državi Bosni i Hercegovini?“

Rifat Dolić:

„Imam danas jedno poslaničko pitanje upućeno Vijeću ministara BiH, resornom ministarstvu i nadležnim državnim institucijama koje glasi: Šta možete i namjeravate poduzimati na profesionalnijem odnosu osoblja i organiziranim rješavanju gužvi na graničnim prijelazima s Republikom Hrvatskom, posebno u dane vikenda i praznikom kada su kolone naših građana, zaposlenih na zapadu, dolazeći kući i vraćajući se na posao, nepotrebno izložene čekanju i maltretiranju na granici i tako nose ružne utiske i masovno iznose ružnu sliku o BiH?“

Slavko Jovičić:

1. „Hoće li se u našem mandatu, sljedećem mandatu, nekada ili nikada početi vraćati imovina Srpske pravoslavne crkve radi mirnog života, jer to Međureligijsko vijeće daje ipak neku nadu da se ovdje može mirno i normalno živjeti?“

2. „Ovim ne želim da vršim pritisak na Tužilaštvo i SIPA-u, ali barem možemo dobiti informaciju, kao poslanici u državnom parlamentu, da li je ijedna institucija predmet obrade ili istražnih radnji. Dakle, kao poslanik, tražim informaciju – jesu li krenuli u bilo kakav posao povodom revizorskih izvještaja, da se vidi ko je tamo šta uradio, s akcentom na BHT1, Javni radio servis, je li se krenulo s raščišćavanjem negativnih radnji i poslova u tim institucijama?“

Selim Bešlić:

„Ko je odgovoran u BiH i zbog čega sprečava i odbija vođenje sudskih postupaka, izvršavanje sudskih presuda i odluka vezano za staru deviznu štednju? Koje su materijalne i nematerijalne političke posljedice po BiH? Tražim odgovor u pisanoj formi i to od predsjedavajućeg Vijeća ministara BiH gosp. Nikole Špirića, Ministarstva pravde BiH gosp. Bariše Čolaka, predsjednika Visokog sudskog i tužilačkog vijeća BiH Milorada Novkovića.“

Mehmed Suljkanović:

„Šta su Vijeće ministara BiH i nadležna ministarstva dosad uradili na preuzimanju evropskih direktiva, kakav je plan i dinamika preuzimanja i da li je moguće taj proces ubrzati i prilagoditi potrebama bosanskohercegovačke privrede?“

Slavko Matić:

„Moje pitanje Vijeću ministara BiH – Dokle se stiglo u realizaciji sredstava predviđenih u ovoj godini za povratak izbjeglih i prognanih, kakvi se problemi pojavljuju u ovom procesu, te na koji način i kakvim mjerama se oni otklanjaju?“

Denis Bećirović:

„Zašto Vijeće ministara BiH nije do sada ispoštovalo zaključak Predstavničkog doma Parlamentarne skupštine BiH, koje je obavezalo Vijeće ministara BiH da izradi i dostavi Parlamentu BiH ovu strategiju? Dakle, pitanje postavljam predsjedavajućem Vijeća ministara BiH i tražim usmeni odgovor ovdje na sjednici, s obzirom da je ovo rijetka prilika da možemo postaviti neko pitanje nekome iz Vijeća ministara BiH, a pogotovo ako imamo u vidu kako nam završavaju odgovori na pitanja u kojima tražimo odgovore u pisanoj formi. Stoga, u skladu s Poslovníkom, postavljam pitanje i nakon završetka pitanja tražim od predsjedavajućeg Vijeća ministara BiH da nam kaže zašto nema te strategije, s obzirom da sve analize govore o porastu kriminala i korupcije u zemlji?“

Jovan Todorović:

„Moje pitanje upućeno je Agenciji za sigurnost hrane BiH. Nedavno smo dobili materijal od spomenute agencije koje se odnosi na genetski modificirane organizme. Autori ovog materijala označeni su kao eksperti. Moj zahtjev, a i pitanje je da mi se dostave podaci o njihovoj meritornosti, odnosno reference, koliko košta izrada ovog materijala, koja literatura je korištena, a kroz njihove reference vidjet će se i njihovi radovi iz ove oblasti, opredijeljenost autora kada su u pitanju genetski modificirani organizmi.“

Lazar Prodanović:

1. „Zahtjev prema Kolegiju - ja bih vas molio da omogućite tematsku sjednicu oba doma na kojoj bi Vijeće ministara BiH odgovaralo na poslanička pitanja. Naime, u ovom sazivu mi još nismo ostvarili ovu inicijativu. Drugo, također u tom zahtjevu, molio bih vas da se obratite Vijeću ministara BiH, da li postoji mogućnost direktnog odgovora na poslanička pitanja? To se, prije svega, odnosi na odgovornost prema zakonodavnoj vlasti i odgovornost zakonodavne vlasti - izabranih zastupnika prema građanima BiH. Dakle, da se razmotri ta mogućnost.“

2. Moje poslaničko pitanje upućeno Vijeću ministara BiH glasi, zapravo zahtijevam da mi se dostavi informacija - koje je aktivnosti Vijeće ministara BiH do sada učinilo na pripremama za popis stanovništva BiH, pa i prije 2011.? A razlog postavljanja pitanja jeste da je to jedna od skorašnjih obaveza vlasti BiH na putu ka evropskim integracijama.“

Ad. 3. Potvrđivanje Odluke predsjedavajućeg Vijeća ministara BiH o imenovanju ministra vanjske trgovine i ekonomskih odnosa BiH

U skladu s Poslovnikom, predsjedavajući Doma Niko Lozančić pročitao je Odluku predsjedavajućeg Vijeća ministara BiH o imenovanju Mladena Zirojevića za ministra vanjske trgovine i ekonomskih odnosa BiH.

U raspravi o ovoj tački učestvovali su: Denis Bećirović, Drago Kalabić, Milica Marković, Momčilo Novaković, Vinko Zorić, Jozo Križanović, Selim Bešlić, Jerko Ivanković Lijanović, Branko Dokić i Azra Hadžiahmetović, kao i predsjedavajući Vijeća ministara BiH Nikola Špirić.

Prilikom glasanja Dom je, sa 27 glasova "za" (Federacija BiH 19, RS osam), tri "protiv" i četiri "suzdržana", potvrdio Odluku o imenovanju Mladena Zirojevića za ministra vanjske trgovine i ekonomskih odnosa BiH.

Mladen Zirojević je, nakon potvrđivanja imenovanja, pred Domom dao svečanu izjavu, nakon čega se prigodnim riječima obratio Domu, zahvalivši se na povjerenju i pozvavši poslanike na koordiniran rad kako bi postigli dobre rezultate.

Ad. 4. Zahtjev Ustavnopravne komisije za razmatranje Prijedloga zakona o izmjenama Zakona o krivičnom postupku BiH po hitnom postupku, u skladu s članom 127. Poslovnika

Poslije kraćih uvodnih napomena predsjedavajućeg Lozančića, predsjedavajući Ustavnopravne komisije Šefik Džaferović obrazložio je zahtjev Komisije za hitni postupak.

U raspravi su učestvovali: Vinko Zorić, Šefik Džaferović, Beriz Belkić i Drago Kalabić.

Prilikom glasanja zahtjev za hitni postupak nije dobio entitetsku većinu. "Za" su glasala 24 poslanika (Federacija BiH 22, RS dva), "protiv" jedan, "suzdržalo" se devet poslanika.

Predsjedavajući je konstatirao da će se o zahtjevu provesti usaglašavanje u Kolegiju kao komisiji.

Ad. 5. Zahtjev poslanika Jerka Ivankovića Lijanovića za razmatranje Prijedloga zakona o podršci domaćoj proizvodnji po hitnom postupku, u skladu s članom 127. Poslovnika

Jerko Ivanković Lijanović podnio je Domu obrazloženje zahtjeva za hitni postupak, kao i potrebe za donošenje ovog zakona.

U raspravi su učestvovali: Bajazit Jašarević, Niko Lozančić, Slavko Jović, Jozo Križanović, Bakir Izetbegović i Momčilo Novaković.

Sa 20 glasova "za" (Federacija BiH 15, RS pet), 12 "protiv" i jednim "suzdržanim", usvojen je zahtjev za hitni postupak.

Nakon usvajanja zahtjeva Dom se izjasnio o Prijedlogu zakona.

"Za" je glasalo devet, "protiv" 25 poslanika. Prema tome, Prijedlog zakona nije usvojen.

Ad. 6. Prijedlog zakona o izmjenama i dopunama Zakona o finansiranju političkih stranaka – predlagači: poslanici Šefik Džaferović, Niko Lozančić i Milorad Živković (drugo čitanje)

U uvodnim napomenama predsjedavajući je podsjetio da je na prošloj sjednici Doma odgođeno izjašnjavanje o Prijedlogu zakona radi razmatranja amandmana Joze Križanovića koji greškom nisu dostavljeni Komisiji, te da je Komisija dostavila novi izvještaj. Također je podsjetio na amandmane koje su u plenarnoj fazi podnijeli Momčilo Novaković, Klub poslanika SNSD-a i Klub poslanika SDP-a.

Šefik Džaferović govorio je kratko u ime Komisije, a u raspravi su učestvovali: Sadik Bahtić, Jozo Križanović, Momčilo Novaković, Drago Kalabić, Šefik Džaferović, Beriz Belkić, Selim Bešlić, Denis Bećirović i Jerko Ivanković Lijanović.

Dom se prvo izjasnio o amandmanima podnesenim u plenarnoj fazi.

Nije usvojen nijedan amandman. Rezultati glasanja o amandmanima su sljedeći:

Amandmani Momčila Novakovića:

- Amandman br. 1. – "za" tri, "protiv" 19, "suzdržano" 12;
- Amandman br. 2. – "za" dva, "protiv" 18, "suzdržano" 14;
- Amandman br. 3. – "za" dva, "protiv" 18, "suzdržano" 14.

Amandmani Kluba SNSD-a:

- Amandman br. 1. – "za" šest, "protiv" 21, "suzdržano" sedam;
- Amandman br. 2. – "za" osam, "protiv" 19, "suzdržano" sedam.

Amandmani Kluba SDP-a:

- Amandman br. 1. – "za" šest, "protiv" 25, "suzdržan" jedan;
- Amandman br. 2. – "za" šest, "protiv" 24, "suzdržana" četiri;
- Amandman br. 3. – "za" sedam, "protiv" 23, "suzdržana" četiri;
- Amandman br. 4. – "za" 13, "protiv" 18, "suzdržana" tri poslanika.

Poslije glasanja o amandmanima provedeno je glasanje o Prijedlogu zakona.

"Za" je glasao 21 poslanik (Federacija BiH 18, RS tri), "protiv" četiri, "suzdržalo" se devet poslanika.

Predsjedavajući je konstatirao da Prijedlog zakona nije dobio entitetsku većinu i da će se provesti usaglašavanje u Kolegiju kao komisiji.

Ad. 7. Prijedlog zakona o dopuni Zakona o službenom glasilu Bosne i Hercegovine, predlagač: poslanik Adem Huskić (drugo čitanje)

Predsjedavajući Doma Niko Lozančić podnio je uvodne napomene o Prijedlogu zakona.

Šefik Džaferović govorio je u ime nadležne Ustavnopravne komisije.

Adem Huskić govorio je u svojstvu predlagača zakona.

Prilikom glasanja, sa 32 glasa "za" (Federacija BiH 22, RS 10) i jednim "suzdržanim", usvojen je Zakon o dopuni Zakona o službenom glasilu Bosne i Hercegovine.

Ad. 8. Prijedlog zakona o izmjenama Zakona o ministarstvima i drugim organima uprave Bosne i Hercegovine (drugo čitanje), Zakon broj 01-02-9-47-1/07, od 12.9.2007.

Ad. 9. Prijedlog zakona o izmjenama i dopunama Zakona o Državnoj agenciji za istrage i zaštitu, sa Izvještajem Zajedničke komisije za odbranu i sigurnost, Zakon broj 01-02-6-58/07, od 17.9.2007.

U uvodnim napomenama predsjedavajući Niko Lozančić podsjetio je na proceduru koja je do sada provedena u Domu o prijedlozima ova dva zakona.

Ministar Tarik Sadović govorio je u ime Vijeća ministara BiH. Obrazložio je razloge za donošenje ovih zakona, te rekao da su pitanja koja su predložena ovim zakonima kasnije regulirana zakonima iz oblasti reforme policijskih struktura, te da je, stoga, prestala potreba za ovim zakonima.

Vođena je rasprava o dvije navedene tačke. U raspravi su učestvovali: Šefik Džaferović, Azra Hadžiahmetović i Drago Kalabić.

Prilikom glasanja pali su prijedlozi zakona iz 8. i 9. tačke, sa sljedećim rezultatima glasanja:

- "za" Prijedlog zakona o izmjenama Zakona o ministarstvima i drugim organima uprave glasao je jedan poslanik, 26 je glasalo "protiv", 10 poslanika se "suzdržalo";
- "za" Izvještaj o Prijedlogu zakona o izmjenama i dopunama Zakona o državnoj agenciji za istrage i zaštitu glasalo je 25 poslanika (Federacija BiH 16, RS devet), "protiv" jedan, "suzdržalo" se pet poslanika.

Ad. 10. Prijedlog zakona o kontroli kretanja oružja i vojne opreme, s Mišljenjem Zajedničke komisije za odbranu i sigurnost

Poslije uvodnih napomena predsjedavajućeg, u raspravi su učestvovali: Šefik Džaferović, Beriz Belkić, Adem Huskić i Jozo Križanović.

Dom nije usvojio negativno mišljenje nadležne komisije. "Za" je glasao jedan, "protiv" 32, "suzdržala" su se dva poslanika. Prema tome, nadležna komisija ponovo će razmatrati Prijedlog zakona i Domu dostaviti novo mišljenje.

Ad. 11. Prijedlog zakona o graničnoj kontroli, s Mišljenjem Zajedničke komisije za odbranu i sigurnost

Poslije uvodnih napomena predsjedavajućeg ministar Tarik Sadović obrazložio je Prijedlog zakona iz ove tačke.

U raspravi su učestvovali: Šefik Džaferović, Momčilo Novaković, Dragao Kalabić, ministar Tarik Sadović, Beriz Belkić, Bakir Izetbegović, Adem Huskić, Sadik Ahmetović i Selim Bešlić.

Prilikom glasanja Dom također nije usvojio negativno mišljenje Komisije – "za" nije glasao nijedan poslanik, "protiv" je glasao 31, "suzdržala" su se tri. Prema tome, Komisija će i o zakonskom prijedlogu iz ove tačke podnijeti novo mišljenje.

Ad. 12. Prijedlog zakona o izmjenama i dopunama Zakona o carinskoj politici BiH (prvo čitanje)

U raspravi o ovoj tački učestvovali su Slavko Jovičić i Momčilo Novaković.

Sa 32 glasa "za" (Federacija BiH 23, RS devet) i jednim "suzdržanim", usvojen je Zakon o izmjenama i dopunama Zakona o carinskoj politici BiH u prvom čitanju.

Slavko Jovičić predložio je jedan zaključak, ali ga je u toku glasanja povukao.

Ad.13. Prijedlog zakona o izmjenama i dopunama Zakona o Vijeću ministara BiH, predlažać: poslanik Milorad Živković, s Mišljenjem Ustavnopravne komisije

Ad. 14. Prijedlog zakona o izmjenama i dopunama Zakona o ministarstvima i drugim organima uprave BiH, predlađač: poslanik Milorad Živković, s Mišljenjem Ustavnopravne komisije

Prvi zamjenik predsjedavajućeg Beriz Belkić (koji je predsjedavao ovim dijelom sjednice) podnio je uvodne napomene.

Vođena je rasprava o ove dvije tačke dnevnog reda.

U raspravi su učestvovali: Ekrem Ajanović, Azra Hadžiahmetović, Šefik Džaferović, Momčilo Novaković, Slavko Jovičić, Azra Alajbegović, Bakir Izetbegović, Halid Genjac, Branko Dokić, Adem Huskić, Denis Bećirović, Martin Raguž, Remzija Kadrić, Jerko Ivanković Lijanović, Jozo Križanović, Savo Erić i Drago Kalabić.

Prilikom glasanja Dom se prvo izjasnio o zaključku Kluba SNSD-a, koji glasi: „Odgada se izjašnjavanje o zakonima čiji je predlađač Milorad Živković do pribavljanja mišljenja Vijeća ministara BiH.“

Ovaj zaključak nije usvojen – "za" je glasalo 12, "protiv" 20, "suzdržala" su se dva poslanika. Branko Dokić povukao je svoj prijedlog zaključaka u dvije tačke.

Nisu usvojena mišljenja Ustavnopravne komisije o prijedlozima zakona. Rezultati glasanja su sljedeći:

- Mišljenje o Prijedlogu zakona iz 13. tačke – "za" glasalo 25 (Federacija BiH 22, RS tri), "protiv" šest, "suzdržana" tri poslanika;
- Mišljenje o Prijedlogu zakona iz 14. tačke – "za" glasala 23 (Federacija BiH 20, RS tri), "protiv" šest, "suzdržalo" se pet poslanika.

Predsjedavajući je konstatirao da slijedi usaglašavanje o mišljenjima u Kolegiju kao komisiji.

Ad.15. Prijedlog odluke o usvajanju Saobraćajne politike BiH za period od 2008. do 2020. godine

Nakon uvodnih napomena predsjedavajućeg, u raspravi o Prijedlogu odluke iz ove tačke učestvovali su: Momčilo Novaković, Branko Dokić, Azra Hadžiahmetović, Martin Raguž, Jozo Križanović i Mehmed Suljkanović. U ime resornog ministarstva govorio je pomoćnik ministra Kojo Koprivica.

Prilikom glasanja Prijedlog odluke nije dobio entitetsku većinu – "za" glasao 21 (Federacija BiH 18, RS tri), "protiv" jedan, "suzdržalo" se 11 poslanika.

Predsjedavajući je konstatirao da će se o Prijedlogu odluke provesti usaglašavanje u Kolegiju kao komisiji.

Ad. 16. Odluka o učešću jedinica Oružanih snaga BiH u operaciji podrške miru "Iračka sloboda" u Iraku radi potvrđivanja (podnosilac odluke: Predsjedništvo BiH)

U raspravi o ovoj tački učestvovali su: Rifat Dolić, Momčilo Novaković i Denis Bećirović.

Momčilo Novaković predložio je sljedeći zaključak:

„Odgada se izjašnjavanje o potvrđivanju Odluke Predsjedništva BiH o učešću jedinica Oružanih snaga BiH u operaciji podrške miru „Iračka sloboda“ u Iraku do sljedeće sjednice Predstavničkog doma.

U međuvremenu će Ministarstvo odbrane BiH pripremiti, u skladu s članom 4. Zakona o učešću pripadnika OSBiH, ocjenu stepena sigurnosti pripadnika Oružanih snaga BiH u toj operaciji.“

Zaključak nije usvojen. "Za" su glasala četiri, "protiv" 22, "suzdržalo" se šest poslanika.

Nakon glasanja o navedenom zaključku, Dom je, sa 30 glasova "za" (Federacija BiH 22, RS osam) i četiri "suzdržana", usvojio Odluku iz ove tačke.

Ad. 17. Izvještaj Zajedničke komisije o usaglašavanju teksta Zakona o jedinstvenom matičnom broju

Predsjedavajući sjednicom Beriz Belkić podsjetio je u uvodnim napomenama da je Zajednička komisija usaglasila tekst Zakona o jedinstvenom matičnom broju prihvatajući ga u tekstu koji je usvojen u Predstavničkom domu.

Nije bilo rasprave.

Sa 31 glasom "za" (Federacija BiH 21, RS 10) i tri "suzdržana", usvojen je Izvještaj Zajedničke komisije.

Ad. 18. Informacija o izdatim dozvolama za promet oružja, vojne opreme i proizvoda dvojne namjene za 2007. godinu

Nije bilo rasprave o Informaciji.

Dom je, sa 28 glasova "za" (Federacija BiH 18, RS 10) i pet "suzdržanih", primio k znanju Informaciju o izdatim dozvolama za promet oružja, vojne opreme i proizvoda dvojne namjene za 2007. godinu.

Ad. 19. 20, 21. i 22.

Prvi zamjenik predsjedavajućeg Doma Beriz Belkić podsjetio je u uvodnim napomenama da u Kolegiju kao komisiji nije postignuta saglasnost o materijalima iz ovih tačaka.

Nije bilo rasprave.

U skladu s dogovorom na sjednici Kolegija Doma u proširenom sastavu, odgođeno je glasanje o izvještajima iz ovih tačaka.

Ad. 23. Davanje saglasnosti za ratifikaciju:

- a) Ugovora o kreditu između Bosne i Hercegovine i OPEC-ovog Fonda za međunarodni razvoj – Projekat rekonstrukcije željeznica dionica (I) Sarajevo-Bradina,
- b) Sporazuma o kreditu između Bosne i Hercegovine i Bank Austria Creditanstalt AG – Projekat izgradnje vodosnabdijevanja u općini Srbac,
- c) Sporazuma o finansiranju između Bosne i Hercegovine i Međunarodne asocijacije za razvoj – Projekat putne infrastrukture i sigurnosti na putevima,
- d) Sporazuma o kreditu između Bosne i Hercegovine i Raiffeisen Zentralbank - Austrijsko dioničarsko društvo – Modernizacija Univerziteta u Zenici.

U uvodnim napomenama predsjedavajući je podsjetio da je Komisija za vanjske poslove dala pozitivno mišljenje o aktima iz ove tačke.

Nije bilo rasprave.

Prilikom glasanja Dom je usvojio prijedlog predsjedavajućeg da se glasa u paketu o aktima iz ove tačke. "Za" prijedlog je glasao 31 (Federacija BiH 21, RS 10), "protiv" jedan, "suzdržala" su se dva poslanika.

Sa 31 glasom "za" (Federacija BiH 21, RS 10), jednim "protiv" i dva "suzdržana", Dom je dao saglasnost za ratifikaciju Ugovora i sporazuma iz ove tačke.

Ovim je realiziran dnevni red 34. sjednice.

Sjednica je završena u 19,30 sati.

Sastavni dio Zapisnika je transkript sjednice.

SEKRETAR
PREDSTAVNIČKOG DOMA
Branka Todorović

PREDSJEDAVAJUĆI
PREDSTAVNIČKOG DOMA
Niko Lozančić